



Suenter liunga maldispostadad ha Tumaisch Monn finalmein astgau terminar il cuors da questa tiara venderdis, ils 18 da fevrer 2005. La Societad da musica Sedrun, il Chor baselgia Sedrun ed in numerus pievel han accumpignau il defunct ils 21 da fevrer sin siu davos viadi. El rauassi en pasch e gaudi la glisch cumpleina.

## Cuors dalla veta

Tumaisch Monn ei naschius ils 3 da fenadur 1923 sco siatavel affon da famiglia Vigeli Monn-Berther. Suenter el nescha aunc ina poppa, mo la mumma miera da quella pigliola il schaner 1925. Quei ei stau ina greva frida pil bab e ses 8 affons. La Rosa, la feglia gronda, haveva lu mo 13 onns ed ha surprui igl entir tenercasa. Tuts ein segidai e zaco eis ei iu. Tumaisch ei sesentius bein en Tgësa nova e daventaus in um plein ideas e bunaveglia. Aschia ha el giu cletg da bunas plassas. Sia amicabladad e curtesia ein stadas bunas premissas per star davontier e survir alla glieud ed era als hospes che han entschiet lezs onns a vegnir pli stediamein en Tujetsch per far vacanzas. Tumaisch ei staus in dils emprems cauluvrers dalla Sutgera Cungieri. Suenter ha el surprui la centrala da latg Sedrun e dirigu quei menaschi cun bien success.

Anno 1948 ei Tumaisch sespusaus cun Tina Soliva. Els han giu 3 feglias. La secunda feglia ei morta cun mo 18 meins. La naschientscha dalla pintga Tresa ha lu medegau empau la plaga. Aschia sebrattan sulegl ed umbriva. In sulegl ei era la niaza Rita Soliva stada che ha passentau pli u meins tut sia affonza tier gl'aug e l'onda Tina.

La preziada dunna Tina era in ferm tegn per Tumaisch. La mort da sia dunna igl onn 1985 ha cuntristau el tochen el pli profund. Il schar encrescher ei semidaus en in mal dall'olma, dil qual el ei mai pli serevegnius. Quater onns pli tard para la sperdita da siu schiender Stanis da smaccar el a tiara. Danovamein ina greva frida!

E tuttina ei Tumaisch adina puspei sefatgs si e ha anflau enzanua confiert e consolazion. Sper sia lavur eis el staus in um plein energia e spir bunaveglia. Aschia ha el surviu als convischins da Tujetsch en pliras cumissiuns ed uffecis ed ei staus sis onns en suprastanza communalia sco gerau. Enorm engaschi ha el era demussau per las uniuns culturalas. Bials 28 onns ha el sunau ella musica da Sedrun - e strusch da crer

– 54 onns ha el cantau el Chor baselgia da Sedrun. Per quella premura singulara eis ei vegnius remuneraus culla medaglia dil papa «Ben merit». Il di da sepultura han las duas uniuns numnadas engraziau a lur commember d'honor cun cant e musica.

Ella veta dil Tumaisch ha igl art giu ina gronda muntada. El ei staus in artist che ha applicau ses duns sin differents secturs. En numerus tocs humoristics ha el fatg rir da cor igl auditori. In toc da rir da schluppar ch'el e dus camerats havevan inventau senumnava Puff-gnam. Pli tard ha el schizun fatg regissur e mussau teaters e dramas pretensiuss.

La stad nezegiava Tumaisch siu temps liber per ir a cavar cristallas. Bein bugen serendeva el sil Drun da Sedrun ed el era daventaus in specialist dallas ruinas. Ils bials fens dattan perdetga da sia capacitat. El ha anflau bein enqual raritad e sia stupenta collecziun fa stupenta pareta. Aparti bien dun haveva el era da scriver e dessignar. A caschun da natalezis ed outras fiastas scriveva el poesias e gratulaziuns ed ornava quellas cun dessegnis ed ornaments. Ils davos onns ha el scret e nudau in tschuat dil temps vargau, da sia veta ed era dad usits ed isonzas dil vargau. Sias notizias valessen la peina da publicar.

Denton, sia vera aveina artistica ha Tumaisch sviluppau sco entagliader. El rimnava ragischs da tuttas sorts e creava figuras. En siu luvratori secumblidava el e las uras sgulavan sco in suffel. Duront la lavur d'entagliar sesviluppava sia fantasia e schava nescher novas fuormas, legras e bizaras. El ha denton era entagliau figuris biblicas e plirs cricifixs derivan da siu maun. Ils davos onns era el sespecialisaus en tagliar ora stialas da lenn. Mo cun cutti da sac ha el modellau varga 50 da quellas clavellas ch'ils purs duvravan avon onns per nudar la furniziun da latg.

Numerus fastitgs artistics lai Tumaisch anavos. Els ein perdetga da siu dun e bien maun. Aunc pli impurtonts ei siu relasch sprial che viva vinavon els cors da quels ch'el ha giu bugen. Siu bien humor, il dun pigl art, siu spért aviert e sia profunda carezia ha el semnau rehamein.

## **Engraziament**

Ils davos onns ha Tumaisch anflau in bien refugi en Tgèsa s. Vigeli. Il persunal ha fatg pli che bien oravontut duront il temps da malesser e malsogna. Agl entir team digl asil, specialmein allas tgirunzas s'audi d'admetter in sincer Dieus paghi. In cordial engraziament a tut tgi che ha fatg dil bien a Tumaisch, oravontut duront ils davos onns da malsogna.